

USIM, AKEPT anjur persidangan IPT Asia Barat

SEREMBAN 2 Okt. - Universiti Sains Islam Malaysia (USIM) dengan kerjasama Kementerian Pengajian Tinggi (KPT) akan menganjurkan Persidangan Pengajian Tinggi Global Arab-Malaysia (AMGHE) 2012 selama dua hari bermula Khamis ini.

Persidangan kemuncak anjuran USIM dan Akademi Kepimpinan Pengajian Tinggi (AKEPT) KPT itu bakal menghimpunkan peneraju utama universiti dari Asia Barat bagi membincangkan isu-isu pendidikan tinggi.

Persidangan bertema 'Kepimpinan Islam dalam Institusi Pengajian Tinggi pada Era Globalisasi' itu selari dengan usaha menyokong hasrat kerajaan menjadikan negara sebagai pusat kecemerlangan pendidikan di rantau ini.

Ia juga bertujuan mengukuhkan hubungan dengan universiti terkemuka dari negara Arab.

Perasmian persidangan itu akan disempurnakan Menteri Pengajian Tinggi, Datuk Seri Mohamed Khaled Nordin.

Ucuptama persidangan dan syarahan turut disampaikan Profesor Ulung, Tan Sri Prof. Dr. Mohd Kamal Hassan dan Setiausaha Agung Persatuan Universiti Arab, Prof. Sultan Abu-Orabi Aladwan dan Setiausaha Agung ASEAN, Dr. Surin Pitsuwan.

Pembentangan kertas kerja, pameran pendidikan serta perbincangan meja bulat juga akan diadakan melibatkan peneraju utama universiti bagi membincangkan isu-isu berkaitan pendidikan tinggi masa kini.

Dalam pada itu, USIM turut mengambil langkah proaktif meluaskan jaringan kerjasama antarabangsa dengan menandatangani memorandum persefahaman (MoU) dengan 12 buah institusi pengajian tinggi (IPT) di Asia Barat.

Antara universiti yang terlibat termasuk Peace University dan Open University di Sudan; Al Neelain University Sudan; Al-Azhar University dan Hebron University di Palestin.